

# internet che passion!

Un librett dala “Fondazione d'infanzia” spiega la manera da dòpral.

testo Pier Baron - pier@illustrazione.ch

**L**a “Fondazione dell'infanzia” la métut in circolazion un bel librett. Con quell i giovin i podan imparà come al sa dopra, par mia riva denta in incident particular, che ormai al dovress anca vess ben cognossüt di “naviganti”.

Ul telefonin l'è una conquista di noss témp e come ul föc, l'aria e ul gas bisogna savé come sa fa a dopral correttament. Spécialment i giovin che a vedom tritracà (smanettare) ala fermada o denta in dal bus, cunt poc rispett par i alter “utenti”, che iè mia entusiasta da sentì di conversazion privat, fai con toni da comizi élettoral. I regol i vegnan ben spiegat in dal librett de la “Fondazione d'infanzia”. Ghe anca denta ul numer da telefon dala polizia e da quii che podan iutà in cas da bisogn, par esempi su problemi da droga, alcool e tabacc. **Se doprat par quel che sa pò vérament fa, ul telefonin al pò vess anca prezios. Par fa savé che sa riverà a cà in ritard, che è rivà scià un alter impegn, che è stai incontrat un soci dala bira e l'è bel cüntala sü (senza doprà ul telefonin).** Pöö sa trova denta i prévision dal temp, ul boletin par savé quanto l'è alta la név. Péricol gha né a josa. L'è quant che sa dopra ul telefonin par cascìa ul nas in di afari di alter o

adiritüra fotografà quel che è proibit e metal in circolazione in rete. La “Regione” la cünta sü da düü fiorasc che i sa métut a fà la pipì denta par ul baul dala machina dala Polcom, senza savé (o infregandos) che la scena la vegniva filmada dala videosorveglianza. Gheva anca un terz manigoldo che al filmava cunt ul telefonin. Mét “in ret” tütt l'ambaradam l'è quasi una normalità. Al sém purtropp indova sem nei a finì, toccando la sfera privada di person. Adiritüra fin al süicidi. Una dona l'è finida nella rete hard perché ul sò amis, forse par vess stai abandonat, l'ha metüt in gir di fotografi comproméent. La cronaca, purtropp, la dev procupass e riferì, perché, come al dis giustament ul Matteo Caratti “i amis d'incöö i podan vess i némis da doman”. A livell économic ghé chi che roba (sgalina) i dati e pöö in vann in gir a vendei. In das setor bancari l'è già sücedut. E sa trata da cifri important, che pöö i finiss anca süla scrivania dal fisco, cunt tütt quel che vegn dadré, come consequenz dal mia avé pagat i impost. ❖

**« I giovin  
che a vedom  
tritracà »**